

E director ta bay apela e sentencia aki

Productor ehecutivo di Aruba International Film Festival declara bancarota ayera

ORANJESTAD – Productor ehecutivo y creador di Aruba International Film Festival Jonathan Vieira a wordo declara bancarota pa un Hues ayera. Cu esey, e ta honra peticion di abogado mr Rudi Oomen cu a haci e peticion siman pasa diabierna. E motibo di e bancarota ta pasobra segun Oomen, Vieira no por a cumpli cu su debenan acumula for di aña pasa, cu ta inclui su cliente cu ta Grupo Intermedia. Mientrastanto Vieira a declara caba cu e lo apela e sentencia aki. E ta lamenta cu e caso a yega asina leu, pero cu e lo sigui cu e proceso pa paga tur hende bek. Solamente cu esaki lo dura un poco mas largo awo. Por lo pronto e festival ta ‘on hold’ te ora cu e situacion aki keda solucionada.

COMPANIA DOMINICANO

E compania dominicano aki Grupo Media a provee tur instalacion di zonido y stage pa e parti di e conciertonan cu

tabata parti di e evento (Film Festival) aña pasa na juli. Dos concierto grandi cu a tuma luga cu mester a ‘diversifica’ e evento cinematografico, pero cu no a logra genera e fondonan necesario pa paga e debenan crea. Banda di e debenan menciona di e grupo Dominicano, tabatin otro instancianan cu tambe a haya nan mes den e situacion unda cu Vieira lo no a paga nan tampoco. Entre nan un compania local cu ta di yiu di Prome Minister Mike Eman, Erik Jan Eman, esta Purple Entertainment. Eman a cuminsa un campaña riba facebook recientemente unda cu a pidi tur hende cu tambe tin e problema aki, pa uni cu nan pa hunto nan ataca e problema contra Vieira.

VIEIRA

Vieira diabierna ainda a declara cu e ta confia cu e lo a sali beneficia den e caso aki ya cu durante e caso aki, varios berdad lo a sali na cla. Segun Vieira a

declara diabierna, cu varios di e companianan menciona lo a abusa di e situacion y a entrega recibonan cu no ta cuadra cu berdad. Interesante ta cu segun abogado di Vieira, a pidi especificamente pa prensa keda pafo, pa motibo cu situacionnan hopi personal di su cliente lo a bin dilanti. E abogado di Vieira, Michael Lopez a sigura cu mayoria di e debenan tabata cubri.

SOLUCION

Recientemente **BON DIA ARUBA** a compronde di su fuentenan cu cosnan tabata di e avansa ey, cu lo a pone cu posiblemente lo tabatin un solucion na caminda pa e debenan y cu esey lo a nifica un eventual continuacion di e festival. Tambe a reuni cu Consejo di Minister recientemente unda cu a pidi pa un ‘reevaluacion’ di e decision inicial di oficina di turismo di Aruba ATA pa ‘bula afo’ di e sponsoring di e evento. Esaki pasobra ATA a dicidi cu nan lo no forma parti



Jonathan Vieira

di e festival e aña aki. E ayudo aki tabata crucial pa AIFF pa por a mercadea esaki den mercadonan internacional. Sinembargo awor ta resulta

cu e situacion ta diferente y cu mester bay reevalua e caso awor cu Hues a dicta na favor di esnan cu a indica cu nan a sali perhudica. □